



Convenio entre a Consellería de Cultura, Educación e Universidade e a Fundación Universidade da Coruña (FUAC) para a colaboración no desenvolvemento de proxectos de formación profesional dual e o apoio aos programas de bolsas para os/as titulados/as en formación profesional, en ensinanza artística e en ensinanza deportiva

Santiago de Compostela, 22 de decembro de 2020

REUNIDOS

Dunha parte, don Román Rodríguez González, conselleiro de Cultura, Educación e Universidade da Xunta de Galicia, en representación desta consellería, e de conformidade coas atribucións conferidas no artigo 34.1 da Lei 1/1983, do 22 de febreiro, de normas reguladoras da Xunta e da súa Presidencia e no Decreto 112/2020, do 6 de setembro, polo que se nomean os titulares das vicepresidencias e consellerías da Xunta de Galicia.

E doutra, don, presidente do padroado da Fundación Universidade da Coruña, en representación desta fundación, segundo nomeamento acordado no Padroado celebrado o 18 de novembro de 2004.

Interveñen en función dos seus respectivos cargos e en exercicio das facultades que para convir, en nome das entidades que representan, teñen conferidas.

EXPOÑEN

1. Que segundo o Decreto 198/2020, do 20 de novembro, polo que se establece a estrutura orgánica da Consellería de Cultura, Educación e Universidade a Secretaría Xeral de Educación e Formación Profesional é o órgano superior da Administración xeral da Comunidade Autónoma ao que lle





corresponde exercer as competencias e funcións que se lle atribúen á Xunta de Galicia en materia de ordenación do ensino regrado en toda a súa extensión, niveis e graos, modalidades e especialidades, así como de xestión dos recursos humanos e programas educativos que se desenvolven nos centros educativos; en coordinación e con independencia das competencias concorrentes que podan ter outros órganos da Consellería ou doutras consellerías.

2. Que a Lei Orgánica 2/2006, de 3 de maio, de Educación, determina no artigo 39 que a formación profesional, no sistema educativo, ten por finalidade preparar aos alumnos e as alumnas para a actividade nun campo profesional e facilitar a súa adaptación as modificacións laborais que poidan producirse ao longo da súa vida, así como contribuír ao seu desenvolvemento persoal e ao exercicio dunha cidadanía democrática.

3. Que a Lei orgánica 5/2002, de 19 de xuño, das cualificacións e da formación profesional, ten por obxecto a ordenación dun sistema integral de formación profesional, cualificación e acreditación que responda con eficacia e transparencia ás demandas sociais e económicas a través das diversas modalidades formativas. Con este fin créase o Sistema Nacional das Cualificacións e da Formación Profesional, e no seu marco orientaranse as accións formativas programadas e desenvolvidas en coordinación coas políticas activas de emprego e de fomento da libre circulación de traballadores.

4. Que o Decreto 114/2010, do 1 de xullo, polo que se establece a ordenación xeral da formación profesional do sistema educativo de Galicia, na súa disposición adicional segunda, determina que a consellería con competencias en materia de educación promoverá a colaboración coas empresas e entidades empresarias e, en particular, coas máis implicadas en sectores clave da economía galega e as relacionadas cos sectores emerxentes. Esta colaboración ten como finalidade, entre outras, a posibilidade de impartir módulos profesionais incluídos en títulos de formación profesional nas instalacións das empresas, co fin de garantir que a formación se realice cos equipamentos máis actuais, así como a actualización profesional. Esta colaboración formalizarase mediante convenio.

5. Que o Real decreto 1529/2012, do 8 de novembro, polo que se desenvolve o contrato para a formación e a aprendizaxe e se establecen as bases da formación profesional dual, pretende crear





as bases para a implantación progresiva da formación profesional dual en España, entendida como o conxunto de accións e iniciativas formativas que teñen por obxecto a cualificación profesional das persoas, combinando os procesos de ensino e aprendizaxe na empresa e no centro de formación, propiciando unha participación máis activa da empresa no propio proceso formativo do alumnado e, daquela, permitir que estas coñezan de xeito máis próximo a formación que reciben, cada vez máis adaptada ás demandas dos sectores produtivos e ás necesidades específicas das empresas. Neste sentido, a empresa e o centro de formación profesional estreitan os seus vínculos, unen esforzos e favorecen unha maior inserción do alumnado no mundo laboral durante o período de formación.

Así mesmo, establece que ademais terán a consideración de formación profesional dual os proxectos desenvolvidos no ámbito do sistema educativo, coa coparticipación dos centros educativos e das empresas, cando non medie un contrato para a formación e a aprendizaxe. Estes proxectos formalizaranse a través dun convenio de colaboración entre a Consellería de Cultura, Educación e Universidade e a empresa colaboradora, e empregarase un réxime de bolsas.

6. Que a Fundación Universidade da Coruña (FUAC), constituída en escritura pública do 24 de marzo de 1997, é unha Fundación de carácter benéfico-docente sen fin lucrativo, tal e como demostra a composición do padroado, o obxecto social e os fins fundacionais establecidos nos estatutos.

A tal efecto a FUAC foi inscrita no Rexistro de Fundacións da Xunta de Galicia co número 183 contando entre os seus membros nas diferentes categorías con numerosas empresas e entidades empresariais de todos os sectores da economía galega, entre elas de sectores clave e emerxentes para a economía galega.

Asemade, e conforme ao artigo 13 dos seus Estatutos, a Fundación ten a consideración de medio propio instrumental e de servizo técnico da Universidade da Coruña e das súas entidades instrumentais, sen prexuízo das encomendas que lle poidan efectuar outras administracións respecto das cales a FUAC cumpra os requisitos necesarios para ser considerada como medio propio.

7. Que a FUAC ten como fin ou misión a promover e desenvolver as actividades propias da Universidade da Coruña (UDC) e as súas relacións coa sociedade; así o recolle o artigo 1 dos seus estatutos, nel indícase claramente o motivo polo cal foi creada e a súa misión do seguinte xeito:





coa denominación de Fundación Universidade da Coruña (FUAC) constitúese unha fundación de carácter benéfico-docente para a promoción, desenvolvemento e financiamento das actividades propias da Universidade da Coruña, e as súas relacións coa sociedade, con especial incidencia nos campus universitarios de A Coruña e Ferrol, e fornecer á UDC un permanente apoio social sen fin lucrativo algún e con duración indefinida. Este fin levase a cabo, principalmente, a través do fomento das relacións universidade-empresa, en todas as súas facetas e ámbitos posibles, pero con especial incidencia na formación, emprego e innovación.

8. Que a FUAC promove dende a súa creación, como unha das súas actuacións prioritarias consonte os seus fins fundacionais, a formación práctica de persoas tituladas e estudantes do sistema educativo galego a través dos seus programas de bolsas de formación, co fin último de conseguir un achegamento e a necesaria interacción entre o mundo laboral e o sistema educativo, cos conseguintes beneficios para ambas as partes.

9. As partes coinciden en salientar a necesidade de fomentar a formación profesional dual como xeito de incrementar o número de persoas que poidan obter un título de formación profesional, de facilitar a inserción laboral como consecuencia dun maior contacto coas empresas e de incrementar a vinculación e a corresponsabilidade coa formación profesional por parte do tecido empresarial, o que ha poder contribuír directamente a formar os/as futuros/as profesionais que necesita.

10. Neste marco, a Consellería de Cultura, Educación e Universidade e a FUAC resaltan a necesidade de uniren esforzos, mellorando o aproveitamento dos recursos e os medios dos que cada unha dispón, para daren un impulso á implantación da formación profesional dual no tecido empresarial galego, e promover a inserción laboral dos/as titulados/as mediante este programa de bolsas e acordan a subscripción dun convenio de colaboración para impulsar e apoiar as actuacións que se dirixan á posta en marcha dun réxime de bolsas de formación FUAC para titulados/as de formación profesional e un réxime de bolsas FUAC para estudantes nos proxectos de formación profesional dual nos que participen empresas e entidades empresariais e os centros docentes autorizados para impartir ciclos formativos de formación profesional dependentes da Consellería de Cultura, Educación e Universidade.





En consecuencia, as entidades asinantes, de conformidade co exposto, formalizan o presente convenio de colaboración no campo da formación e da aprendizaxe de acordo coas seguintes,

CLÁUSULAS

Primeira. Obxecto do convenio

O obxecto do presente convenio é establecer as condicións xerais polas que se rexerá a colaboración entre a Consellería de Cultura, Educación e Universidade e a FUAC para:

- a) A creación dun programa de bolsas de formación destinadas a titulados/as en formación profesional, en ensinanzas artísticas e nas deportivas do sistema educativo, para proporcionarlles unha maior formación e cualificación práctica e así facilitar a súa inserción profesional.
- b) O desenvolvemento de proxectos de formación profesional dual no sistema educativo, mediante a implantación e a aplicación dun réxime de bolsas FUAC nos proxectos de formación profesional dual que autorice a Administración educativa mediante un convenio con empresas colaboradoras.

Segunda. Programa de bolsas de formación para os/as titulados/as en formación profesional, en ensinanzas artísticas e en ensinanzas deportivas do sistema educativo.

O obxecto deste apartado do convenio é establecer as condicións xerais polas que se rexerá a colaboración entre a Consellería de Cultura, Educación e Universidade e a FUAC para apoiar as actividades da FUAC relacionadas co desenvolvemento de programas de formación práctica en empresas de persoas tituladas en formación profesional, ensinanzas artísticas e ensinanzas deportivas do sistema educativo de Galicia, así como a súa promoción e divulgación social.

De acordo con este obxectivo e no contexto da colaboración que establece este convenio, a FUAC implantará e desenvolverá programas e actuacións específicos encamiñados a desenvolver o mecanismo que facilite a realización, por parte das persoas tituladas en formación profesional, ensinanzas artísticas e ensinanzas deportivas, de prácticas de formación en empresas de calquera tamaño e sector de actividade.

En consecuencia, a Consellería de Cultura, Educación e Universidade e a FUAC colaborarán para proporcionarlles ás empresas que o soliciten os perfís profesionais demandados





relativos a persoas tituladas en formación profesional, ensinanzas artísticas e ensinanzas deportivas, de xeito que leven a cabo un período de prácticas e formación na propia empresa en condición de bolseiros.

A FUAC comprométese a desenvolver o papel de interlocutora coas empresas, recollendo as súas solicitudes e establecendo as bases e os criterios para o programa de bolsas destinado ás persoas tituladas de formación profesional, ensinanzas artísticas e ensinanzas deportivas do sistema educativo de Galicia, que se adapten ao perfil demandado. Igualmente obrígase a difundir publicamente entre as persoas tituladas a existencia de programas de bolsas de formación e prácticas.

A Consellería de Cultura, Educación e Universidade e a FUAC, na medida das súas competencias, levarán as actuacións necesarias para que no Servizo Público de Emprego de Galicia se facilite información ás persoas demandantes de emprego que teñan a condición de tituladas en formación profesional, ensinanzas artísticas e ensinanzas deportivas sobre a existencia dos programas de formación da FUAC, e que se recolla, de ser o caso, o seu interese polo devandito programa.

Este programa de bolsas de formación da FUAC é un mecanismo de natureza extralaboral pensado co fin de beneficiar directamente aos/ás propios/as bolseiros/as para que perfeccionen os seus coñecementos, permitindo así ampliar o seu campo de coñecementos. O programa de bolsas de formación da FUAC cumpre os requisitos previstos na disposición adicional quinta do Real Decreto-lei 28/2018, do 28 de decembro, para a revalorización das pensións públicas e outras medidas urxentes en materia social, laboral e de emprego e no artigo 1 do Real decreto 1493/2011, do 24 de outubro, polo que se regulan os termos e as condicións de inclusión no réxime xeral da Seguridade Social das persoas que participen en programas de formación, polo que a devandita norma resulta de aplicación.

Terceira. Proxectos de formación profesional dual no sistema educativo, mediante a implantación e a aplicación dun réxime de bolsas FUAC

O réxime de bolsas destinado aos proxectos de formación profesional dual é un mecanismo de natureza extralaboral, pensado co fin de beneficiar directamente as propias persoas bolseiras, para recibiren a formación necesaria para a obtención dun título de formación profesional de grao medio ou superior ou, de ser o caso, acreditación parcial acumulable. O programa de bolsas de formación de FUAC cumpre os requisitos previstos na disposición adicional quinta do Real Decreto-lei





28/2018, do 28 de decembro, para a revalorización das pensións públicas e outras medidas urxentes en materia social, laboral e de emprego e no artigo 1 do Real decreto 1493/2011, do 24 de outubro, polo que se regulan os termos e as condicións de inclusión no réxime xeral da Seguridade Social das persoas que participen en programas de formación, polo que a devandita norma resulta de aplicación.

A implantación e a aplicación do réxime de bolsas, con suxeición ás condicións e ás características recollidas no presente convenio, terá lugar mediante a inclusión, no proxecto de formación profesional dual que se autorice e formalice entre a Consellería de Cultura, Educación e Universidade e a empresa colaboradora, dun sistema de bolsas dirixido ao alumnado participante.

Para os efectos do disposto anteriormente e nos supostos en que as empresas que asinen convenios coa Consellería de Cultura, Educación e Universidade para colaborar en proxectos de formación profesional dual opten por incluír un réxime de bolsas para os estudantes aos que se refire o proxecto de formación, o devandito réxime de bolsas poderá ser o das bolsas de formación profesional de estudantes de FUAC; neste caso, o réxime de bolsas estará suxeito ás seguintes especificidades:

- a) A empresa, en virtude da sinatura do convenio coa Consellería de Cultura, Educación e Universidade, adquirirá o status de entidade colaboradora do Programa de bolsas formación profesional dual (PBFPd). A administración educativa informará a FUAC das sinaturas de convenios con empresas para desenvolver proxectos de formación profesional dual no réxime de bolsas.
- b) Para a efectividade da bolsa, as empresas aboarán á FUAC en períodos mensuais e con carácter irrevogable a cantidade económica estipulada no convenio asinado entre a empresa e a Consellería de Cultura, Educación e Universidade. Os ingresos deberán facerse efectivos nun número de conta da que é titular a FUAC e do que será informada a empresa.
- c) Para a efectividade do réxime de bolsas, as empresas colaboradas e as persoas bolseiras deberán, en todo momento, cumprir os requisitos establecidos na normativa que regula os proxectos de formación profesional dual e nos convenios asinados entre empresa e Administración educativa, dos que se entregará copia a FUAC a fin de que, xunto cos informes do seguimento que no seu caso se efectúen, poida levar a cabo tanto a efectividade da bolsa coma o control do cumprimento do réxime da mesma.





Cuarta. Difusión das actividades

A FUAC obrígase por este convenio á realización das accións obxecto do mesmo e a facer constar en calquera tipo de publicidade e información que realice ao respecto a participación e a colaboración da Consellería de Cultura, Educación e Universidade.

Quinta. Obrigas laborais

A subscrición do presente convenio non supón relación laboral contractual nin de calquera outro tipo entre os/as profesionais que vaian desenvolver as actividades e a Consellería de Cultura, Educación e Universidade, de tal xeito que non se lle pode esixir responsabilidade ningunha, nin directa nin subsidiaria, polos actos ou feitos acontecidos no seu desenvolvemento.

Sexta. Comisión de seguimento

Establecerase unha comisión de seguimento, control e supervisión, que se reunirá cando se considere oportuno por calquera das partes asinantes.

Esta comisión estará constituída por:

- Dúas persoas representantes da Consellería de Cultura, Educación e Universidade, unha das cales exercerá a presidencia da comisión.
- Dúas persoas representantes da Fundación Universidade da Coruña.
- Unha persoa funcionaria da Consellería de Cultura, Educación e Universidade que actuará como secretaria.

A comisión ditará as súas propias normas internas de funcionamento e deberá reunirse sempre que sexa necesario para o bo fin da colaboración. Entre outras, á comisión corresponderanlle as seguintes funcións:

- a) Propor actuacións concretas de colaboración.
- b) Preparar as addendas ou os anexos de execución do presente convenio sobre as modalidades de colaboración recollidas nel.
- c) Realizar o seguimento das actuacións específicas que se leven a cabo, así como aclarar e decidir cantas dúbidas poidan xurdir na súa interpretación e execución.

De consideralo de interese para os obxectivos e o desenvolvemento do convenio, as partes asinantes poderán invitar ás súas reunións a representantes das ensinanza de formación profesional de Galicia, pola súa condición de persoas máis próximas aos receptores finais dos programas e das accións que abrangue o convenio.





Sétima. Vixencia do convenio

O convenio entrará en vigor na data da súa sinatura e terá unha vixencia de catro anos, podendo prorrogarse, por unha soa vez, por acordo das partes mediante a addenda correspondente. Non obstante, o convenio poderá denunciarse por calquera das partes; a denuncia deberá realizarse por escrito e con dous meses de antelación á data na que se queira poñer fin á relación entre as partes.

De todos os xeitos os programas de bolsas de formación para titulados/as e os proxectos de formación profesional dual iniciados, ao amparo deste convenio, deberán finalizarse.

Oitava. Protección de datos

De conformidade co disposto na Lei orgánica 3/2018, do 5 de decembro, de protección de datos persoais e garantía dos dereitos dixitais, e co Real decreto 1720/2007, do 21 de decembro, polo que se aproba o Regulamento de desenvolvemento da Lei Orgánica 15/1999, de 13 de decembro, de protección de datos de carácter persoal, o alumnado, as empresas e a fundación que por razón das actividades formativas teñan acceso a datos de carácter persoal, non disporán dos mesmos con finalidade distinta á esixida polas accións formativas.

Neste sentido, haberá que atender ao contemplado no Regulamento (UE) 2016/679 do Parlamento Europeo e do Consello de 27 de abril de 2016 relativo á protección das persoas físicas no que respecta ao tratamento de datos persoais e á libre circulación de estes datos e polo que se derroga a Directiva 95/46 CE (Regulamento xeral de protección de datos).

Novena. Publicidade do convenio, transparencia e bo goberno

A firma deste convenio suporá o consentimento expreso do interesado á administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 9/2013, do 9 de decembro, (BOE 10-12-2013) de transparencia, acceso á información pública e bo goberno e co Decreto 126/2006, do 20 de xullo, polo que se regula o Rexistro de Convenios da Xunta de Galicia.

Décima. Carácter administrativo do convenio

O presente convenio de colaboración posúe carácter administrativo por razón do contido e materias sobre as que o mesmo versa, as cales ao abeiro do disposto na Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas





**XUNTA
DE GALICIA**

do Parlamento Europeo e do Consello 2014/23/UE e 2014/24/UE, de 26 de febreiro de 2014, o exclúen do seu ámbito de aplicación, sen prexuízo da aplicación dos principios desta lei para resolver as lagoas ou dúbidas que a súa aplicación suscite, conforme ao contemplado no artigo 4 da citada lei.

Dada a natureza administrativa deste instrumento xurídico, as controversias ou cuestións litixiosas que puideran xurdir na súa aplicación e non puidesen ser solucionadas no seo da comisión de seguimento, serán resoltas pola xurisdición contencioso-administrativa.

E en proba de conformidade co exposto, ambas as partes asinan o convenio na data da súa sinatura dixital.

O conselleiro de Cultura, Educación e
Universidade
Román Rodríguez González

O presidente do padroado da Fundación
Universidade da Coruña (FUAC)



Xacobeo 2021